

四庫全書

集部

欽定四庫全書

集部

滄洲塵壘編卷七

詳校官庶吉士臣瑚圖禮

主事臣呂雲棟覆勘

謄錄監生臣范重榮

謄錄監生臣程廷璋

欽定四庫全書

滄洲塵缶編卷七

宋程公許撰

七言古詩

觀浩齋楊先生偕後溪劉先生白鶴魏校書潼川南樓唱酬三復嘆仰馳介詢問以古篆體書西銘為壽並和元韻

一日不見如三秋人如湘浦春風樓危途崔嵬坂九折萬事變滅水一漚我公方寸湛古井砥柱四海之頽流

藝蘭九畹媚幽處公暇獨立誰為儔畏虎一悟真知說
亡羊不向諸子搜默叅鄒軻論直養長與潛聖同四憂
綉衣方看霄漢立青雲忽賦汎濫浮平生得趣稽古樂
如水赴海無時休考槃棲我書萬卷有意晚歲專一丘
時無子西賦招隱貪伴漁翁歸釣涪澗瀦脉絡元不斷
洙泗氣象端可侔身縻簡書去無絲夜夢策蹇霜滿裘
悠悠底是歸宿處願聞一語歸而求勇撤臯比誰復見
訂頑之訓萬古留篆書為公揭素壁千里持寄寬離愁

元關道祕香莫授玉鑰為我一啓不

池口昭明太子釣磯蜀僧住山相邀訪古和壁

間韻

繫船池口汎濫遊老禪邀我半日留岸莎堤柳度窈窕
初暑忽送風雨秋蕭郎釣臺三間屋萬頃煙波媚幽獨
長令千載好事人貪為淮山流遠目芊芊蔓草迷長竿
臺城直作平野寬那知萬古文選理不盡詞源八節灘
英菟遠逝招不得謫仙小杜底處覓插天酋萃九芙蓉

試與憑高閒物色

多勝亭

宜春以韓公重東湖尤一郡勝處祖侯營荆
亭臺碣記古雅且南軒題評盧石扁榜如新
而委之荒落可乎稍加繕修頗復舊觀仍摘
昌黎詩句扁新亭為多勝紀以長韻

昌黎文章緯河漢只合影纓侍香案帝遣騎麟下大荒
肯為吾州一笑粲至今千里被膏沐猶自靄雲餘絢燦

後二百年來祖侯不以左官興寤歎西園作堂娛歲豐
東城選勝湖波漫不知此湖孰經始秀水之涯矗堤埤
花嶼逶迤雙徑通荷蕩蓀莽三塘貫憑堤築臺負清曠
羈官賴此泄憤惋嘉二三子南渡來營葺頗能還舊觀
風流轉燭冷如鐵仆雨摧風存者半蹇余意倦直承明
次補適來忝藩翰腐不能通柱後文拙尤不辨牙籌算
自公正須豁滯懣時屈何能事輪奐支傾補壞聊復爾
護邃培高足娛玩江山入手要彈壓風月無邊供判斷

高賢一語真實錄勝游雖多此為冠水花岸草錯雲錦
雨瘴清嵐無界畔忘機自與鷗鷺親無事從渠鳧鷖散
老仙音塵可得追移得盧家石堅悍題評倚重南軒翁
瞻相如瑟黃流瓚迂頑我豈經世具乞身去詠南山斫
作詩聊與來者期何去後思可稱讚尚友三賢自不差
時復憑熊一來看

和賈伯用架橋築堤韻

策蹇僕僕忘寒溫勞心惻惻桑棗村長虹卧穩煙雨面

千金屹障波濤痕涉川利作初九益括囊肯為六四坤
道旁築室勿與議可使正論成排根

六和塔寺館三宿和秀江亭詩牌韻

鯨呿鼉擲三神山幻境起滅指顧間東西颿樯來復去
得似上方僧獨閒看山看水知多少詩債責償殊未了
膠膠擾擾竟何如早結把茅佚吾老

雪峯道院

寺評劉侯分竹石紐創此院賦詩落成左綿

勸學從事某借韻寄題

琅函真筌何所云丈人差我五嶽尊
喬雲書護耀魄寶玉繩夜低天
市垣瓊瑤其上矗千仞冰雪為人醒
醉魂飛鴻沒處杳難辨飼虎遺跡應
猶存甘泉使君趣丘壑薰爐默坐存
崑崙

真誥有想崑崙
崙得仙者

高齋圖史羅左右大厦

風月相吐吞巖泉酒熟芳桂藥茶鼎火活蒼松根坐邀
麻姑來擘脯祇恐摩詰難亡言界天之雪滿窻戶喚起
老仙重與論丁寧來者時汛掃燕寢可避蜂衙喧

凌雲李聖可西郊別墅創小亭屬余作風月無
邊古篆四字為扁顏平岡馮炳仲賦詩和者盈
軸因賦此

我不願築受降城朔方職總管又不願金狨繫馬西池
萬人看只願寬閒寂寞濱倚醉高吟青玉案秋霜斫蟹
草泥滑春浪叉魚楊柳貫江湖長恐寸心違世界饒君
左手斷水寒軒檻碧萬頃山掃巫娥雲一段鶴唳那愁
蕙帳空羊裘未讓嚴陵岸是家太白孕英精待詔鑿坡

摘藻翰藕船駕得玉井來荔支腰重金章煥至今人物
說淳熙可並成周歌伴真誰令七葉侍中貂風月無邊
奉娛翫犧尊屢喚斟玉液科斗何能體先漢相期雲路
早騫翔分明世澤流波漫

聖可乃淳熙從官李公昌圖之孫先世自華州入蜀者

諸友載酒飲滄江海棠下公許以上壽親庭不
克與勝賞翌日招飲出示新作敬和元韻

杜陵老翁身轉蓬浣花溪頭詩更工向來隱語最沉著
錦宮花里看曉紅想當繞樹經營時吟思拍拍春醅醲

重附疊萼今勝昔五百年遠誰為容使君結廬滄江上
補處不隔牛馬風竹蹊花塢穿窈窕佳趣似是桃源同
一年好春海棠擅隔牆恨不載酒從頗聞花陰喧語笑
何似橘仙隱巴邛主人眼底有青白風流駭俗阮嗣宗
化工不耐凌鑠苦故使分薄阿堵中那知陽春恣陶寫
何物芥此雲夢胸玉湖亭上一尊酒柳花漠漠江溶溶
錦機轉眼雪糝逕還有明年春再逢要知造物無盡藏
那肯一日居成功商謳為公不成調誰叫閭闔箋天公

晚紅一醉亦聊爾休逐滄浪垂釣翁

楊子春酌飲清節亭示諸公舊賦索和

雨餘熱喘思澡雪有客叩門節九節相携欸竹墨池家
竹間張飲碧筒折縱縱玉立肩相齊何羨掖垣歌紫微
會須把臂入林去山王掉首麾去之骨相恐難飛食肉
功名浪費殺青竹渭川自有千戶封持此較彼差不俗
平生我亦厭榮觀為君醉眠蘄簟寒人間有此碧玉鏡
那怕火織張炎官

滿戍有日置酒學宮為諸友贈別

左綿山川平且寬周遭四境皆竒觀廣文官曹冰雪寒
摧風剝雨無時安巧手無麪良獨難汗如瀋時一歎
浪浪春雨紅杏壇堆盤苜蓿空闌干三年轉燭槐夢殘
明當西郊掛征鞍平生但知取友端忍御艾蕭捐杜蘭
丁寧何須勸加飡活計不但故紙鑽孔轍回環顏一簞
君民堯舜無兩般此印萬古元不刊聚奎堂中儼衣冠
尚友謹勿輕朽壤丈夫事業期不刊脚根牢取百尺竿

九日以酒贈雪江胡賢良蒙惠詩和韻

孫壁辛楣芰荷屋靜揖秋風
酣聖讀占斷湖天拓戶封
不待詔書賜一曲紅塵車馬交衢術
渠肯冠霞立於獨
滿城風雨又重陽
念子蕭疎對寒菊
雙壺遣贈灑蛆浮
想見羈愁盡蛾伏
高人一巢有餘地
底須駟馬駕車軸
但得長年交酒聖
不妨一笑命騷僕
若云歸隱須買田
巢由嗤人未免俗

碧雲程道士自清江相過示以玉淵劉清叔詩

借韻同賦

掣鈴者誰金門客神秀迫人似曾識
八返未問龍虎交
一杯且薦琳腴碧我昔卜隱大面山
招旌驅人難得閒
梗野自適麋鹿性逡巡遠引鷓鴣班
始青一氣色非色
此中自有金丹訣政須趺坐共商量
忍向塵勞磨歲月
為玉汝賦萼湖借田家樂府韻

萼湖何物堪怡悅與鑑湖境無差別

萼湖與鑑湖相近

詩人胸

貯冰雪清湖邊吟作寒螿鳴紫萼可羹菰可飯把茅自

足了一生食前方丈位鈞軸何如深林一枝足寬閒之
野寂寞濱釣有緡竿耕有犢男兒何須嗟命薄富貴不
淫貧賤樂

李宰和唐子西芙蓉溪詩索同賦

子西詩律傷於嚴掉頭沉吟春飲酣何曾一字低處著
有似國工精手談千古江山長媚好水曹依舊清風掃
只慙次補較非才更願乞靈依此老天涯憔悴一詩窮
溪流泯泯山叢叢事須登臨作酬賞剝破酒榼官泥紅

李季實以龍鶴山菜餅見惠長句將之呂兄亦

有和章借韻答謝

山林遠志久封殖誤隨小草輒輕出得似乾淳太史公
萬古不磨董狐筆太史龍鶴山人翫心竹素如醉醒
鍊師喜為作妙供靈苗相間叢卉生七年飄搖湖海客
生怕魚鯉腐關隔圓規得自太史孫清苦本來同氣質
十洲地產富瓊芝龍鶴何曾欠蕨薇與君約歸如有期

躍鯉何用薑芥脍

李鍊師山中仙者躍鯉亦女仙故事也

和鍾道士若谷投贈韻

流年袞袞灘頭浪蕭騷白髮三千丈人生榮祿底須多
何嗟及矣負米養滄溟不禁尾閭泄養素畧窺道家說
庶幾真一復保全可以衆言強分裂瀛洲醉揮碧霞盃
集雲峯前偶此來吏衙鳧散鈴索靜恠有飛佩鏘瓊瑰
紫霄洞經曾熟讀歸來煙霞繞冠服嵯峨千仞獅子峯
寒棲旋營數間屋颺遊為我晷刻停汲泉引滿如海鯨
要學旌陽累功行不妨天詔遲飛昇岷峨念歸可輕發

枉辦青鞋并布襪禁闈侯藩信所遭幾曾仰空虛吐吐
爐薰浪擬叩玄微何如趙州東院西了知此理只麼是
亡羊何必惑多蹊自心有疑須自斷勿用周遮添着一
重案鍊師鍊師為我印證之六合同風兮九州共貫

和陸放翁笑詩呈雲端子

道人身佩含景蒼精龍灑落不與流俗同酒酣興逸不
覺一捧腹那似義府有刀藏其中人間萬事誰醜復誰
好兒童何知不必便驚倒試問虎溪三士之樂如此不

霜寒夜永勿遣虛觥籌

別雲端子和元字韻

玉樓雙聳吟肩寒自孔氏出參玄元荒尋得君相指似
清吐對我如瀾翻歸歟金華葺茅屋間有洞戶通麻源
世塵鞦韆勿浪出執手且須空此尊

寄謝碧雲張高士

臨邛自昔多仙才鶴鳴神丹夜昭回唐鴻都客尤奇俊
飛神碧落超蓬萊宋采石戰強敵摧少微褒封自公台

玄風寥寥闕寒灰那知軒髯張心印今復傳雲來儒釋
老氏鼎立如三才凡圓形數由剗裁授非其人委煙埃
如碧雲張亦異哉幾年願見心渴梅吾徒笑我老尚孩
三生髣髴同侍劫刃臺羊腸百折何獨行虺隤赤城醮
盟三月齋青雲有梯攀崔嵬星冠禹步旋斗魁天門蕩
蕩金碧堆章函歷上九虎開津梁爽靈帝所哀瞬息命
令傳風雷帝宸留侍非不佳眷此濁海多劫災力扶道
法授沉埋三千功行之積仙可階世人汨沒井底蛙各

主其教相舐排吾師思以一理該與我心契無復猜何
當歲晚棄置塵累棲巖一龕煙雲相與儕芝朮可庖露
可杯商略道蘊生死裁左携羨門安期右洪崖超塵沙
劫馭氣凌九垓

和小阮沈感時韻

豆籩列炙凌丘垤有酒如澠旨且洌得似年豐世小康
漁樵結社談蜚屑畏途羊腸徧宇縣二十年間行未徹
憂時無力為支撐問計商顏未能決頻年水旱釀災眚

况復刀兵值空劫剝瘡補肉不遑恤椎膚瀝髓供一切
詩歌碩鼠想樂郊澤自無魚可堪竭何時天狼隕芒砀
盡驅狐兔繫故穴危機欲濟重坎陷暴征須戢猛火烈
所期世路靜風塵甘隱瓜疇耘露漙阿咸年少知激昂
勉法前修立功業

先兄叔逢種花盆池秋初開一朶二姪感悼成
韻作栢梁體答之

懷昔三昆皆青春揮毫翻水驚鬼神我方卅角瞠後塵

有如森林鹿牲牲高堂壽朋鬢韜銀時節歌舞綵服新
二十年間存幾人叔氏終老一葛巾盆池折花秋中旬
共房感我雙瓜辛無窮生意根陳陳寸卉雖微均我身
壅培涵浸宜及辰一氣之運屈必伸子如不信有蒼旻
一冬無雪和陸放翁梅詩陸句豪誇余句清苦
要自不失梅兄本分家風也

清羸怯問黃昏月呵手寒窻寄幽絕一枝幽艷棖觸人
花與詩人皆本色孤山飛鶴舞空去詩家何曾絕正脉

經營慘澹空亡竒不如倚筆珊瑚格
滕六冬來偏放情
暖日暄風渾圻破便擬飛章上訴天
怕主林神合連坐
我昔與梅同謫墮隨分世塵聊贖過
薰天肉食休問渠
萬古清芬首陽餓

制幕孫君即益昌舍館疊石栽竹於盆池索賦

好山意度如高人偃蹇那肯來
朱門青油幕中盛快士
愛山惟恐不能致
昭亭東望天一涯
武擔亦復歸遲遲
開窻延得竹君瘦
借竹為媒來石友
煙雲吐吞一席間

瓦盆取月湖海寬羽書撤警文書省一炷水沉銷日永
不嗔鄰客喚門頻支頤對翫玉嶙峋平生我亦煙霞痼
強擬為君援筆賦破除幾許白雲腴腸枯搜攬一句無
昨宵夢怕大刀折詩債未償寧許別從君差樂休念歸
贖借前箸裨籌帷主公威聲劇敵壘旆旌行拂終南翠
若携諸吏上崢嶸容我後乘陪載賸

別馮伯昭新班歸三榮末句乞呈似使君王萬
里年兄

東郭滄江市橋柳邂逅論心成二友仙曹如水往復來
永晝論文間卮酒十五年間如掣電屋梁落月幾回首
愛君冲靜天機深玉雪照我驚老醜寶屏兩月同舍館
青眼相看祇如舊秋風一鷓空百鷺四海知心悦齋老
鵲聲查查客當還鶴髮倚門春一笑榮途埃壒倦馳驚
聖域工夫窺突與挈雲豈無九霄志緩轡徐驅千里道
平生我亦重擇交與君同盟期耐久紛紜歸夢促嚴裝
黯淡羈情更分手旭川夙檀溪壑勝雌堂况得文章守

羸糧寧憚兩日程
龍洞煙霞共幽討

投贈洪倅司令舜俞

崔侍郎入蜀首蒙檄召
刺薦舜俞侍郎客也

博陵先生天下士
圭瓚鼎彝宗廟器
駕風閭闔駐參旗
要與疲氓起憔悴
同來誰是儉府僚
一朶庚蓮吐秋水
義以取人道
自任河陽主賓信
竒偉誰云風月立
分鼎待借前籌答
知已峨岷其下十六城
魴魚鱣鱣更頰尾
情傷涸轍轉清波
陡覺濠梁復生意
井梧幕府省文書
雪界松圍絕烟燧
餘事何妨筆墨工
浣谿新沐煙雲膩

老翁補處待公續燕外鷗邊儘吟思主公佇還丹地峻
携上崢嶸去天咫社樗愧我本亡竒冷落官曹窮五技
何階方便來相招醪醴一朝饗厚味燕臺叢葉萬金黃
豈意謙勤從隗始眇然人物索扶持勿惜拔茅多引類
君不見璇杓一夜搖天東人間萬物皆春風

和謝孟彞祕丞館中書懷

虎頭一生信癡絕虛名誤人可多竊蕭疎白髮寧可貸
流浪紅塵幾時歇三神山負隔罨紛衆君子聚瑩冰雪

塵犀時接寶唾香玄關要待玉篴掣緬懷元祐載賡唱
誰為崇丘補亡缺直廬竹帛不停披醜池齋孟寧浪出
故都何在渺煙埃湖山也自佳風月擬結齊盟修故事
莫向深杯辭百罰烝哉與我心事同詩來可作成規揭
甚慙老醜強塗抹得與嬋娟夸二八靜思世故殊未艾
瀕洞憂端不可撥由來館殿育英髦期為朝家效絲髮
不然坐費玉帛招奚異信手沙土撮天闕何曾九關隔
愚慮或補萬分一諸君信是廊廟具老我已愧瓶罌溢

驚看淋漓灑巨軸豈比呻吟點枯筆吾儕立名要不朽
榮祿過眼才一瞥從今朝謁得休暇勿使文會多間濶
摩挲尊壘品書畫上下古今商得失乞歸早得隱林巖
誇與漁樵舊人說

和使君王子堅游鄧氏天開圖畫韻

春風滿城開笑顏使君明當出遊山東州山川北佳麗
凌雲耀日季孟間紫絲步障元不要飛檻層欄一憑眺
歲豐民樂征調寬挾四老仙共舒嘯使君吟肩李杜齊

落筆便覺三山低招來倦客同賡載韻險令我窘見擠
煙霞風月無疆界不憂寒具油侵壞寄謝摩詰休苦心
使君詩是有聲畫

壽悅齋李先生

君不見溫公崇福十五年上下千載書法嚴又不見蜀
公靜退不待耄鐘律製成天一笑樂則行之憂則違出
處無非聖之時一朝都人擁馬首留相天子不得辭頰
昌胡為屹不動各以就去揭槩儀悅齋先生天下士琬

琰琮璜國鎮瑞盛名姸節耀古今歲晚松階猶候對時
臺劇談鋸蜚屑志堂析疑笈啓鑰夜歸風雨一龕燈目
電窺書光爍爍禹貢山川如指掌漆園之解無郭象更
將次五訂箕疇不妨後覺勤鑽仰年來岷峨殊愴悽公
與潔齋名德齊長庚磊磊配曉月士有司命國蔡著卧
架詩書差足樂憑高忍見楚氛惡豈不望公勇拂衣正
恐百姓須公活願公相業追元祐以一至誠服雄狡願
公眉壽如東軒黃髮皤皤國元老雲蒸雨族霈作霖賢

以類聚治乃興卷舒在公亦何心四海矯首西山岑薰
風自南一披襟起舞稱壽千黃金洗耳五絃虞氏琴為
公緩軫歌嗣音

壽李子先

正陽用事月初吉騎鯨之孫生此日滴露能將三晝吞
積風少忍六月息平生最耐反復看其文炳彪心地直
骨肉十年長眼青今年差覺叢談密一尊稱處薰風曉
紅藥丫頭香露濕誰令絕艷殿光景羣葩斂避表獨立

洗盡人間丹粉妍傾國傾城須正色文章瑞世寧論晚
時來造物能借力為君折花起長歌請君滿引無餘瀝
丹霄一武不難梯更看飛階弄吟筆

壽廷邁叔祖

吾宗譜牒祖通義蟬聯到公十五世五派之分同一源
如木有本瓜有蒂公家門戶最赫奕簪紱相承真鮮儷
堂堂鐵面渠州牧能以方寸永來裔用之不盡地自寬
信有詩書為可繼龍駒墮地汗流赭修途萬里自迢遞

箭鋒巧中由基的桂香慳與春官第誰知風雨短檠燈
慣作儒生窮活計彤檐問俗歷三州和平斂退鋒芒銳
羹藜任笑庖煙冷嚼蠟倦親歌舌脆似聞皇華催遣送
斗城未必能留滯廣平傳緒五百年凜凜千鈞若旒綴
藉公一力為挽回深刷家聲舊芳桂平生况耐反覆看
攄蓑懸知多斂穡鼎來富貴正黑頭粲粲芝蘭滿庭砌
周盟有幸聯肺腑魯頌居然覺疣贅所願宗風振寂寥
敢將末路竊聲勢霧雨濛濛梅子黃廉泉堂上薰風細

千金稱壽意何如自倚情親為新製

壽漕使者權帥黃大監

金華仙人紫綺裘朝戲三山暮十洲偶經劍浦弭節留
浪花噴雪躍兩蚪海若褫氣馮夷愁精英為公一日收
義理之窟探魯鄒詞章之工迫韓歐榮途砥平不停輟
盛名何自徹冕旒粉省賜香馥衣綈萬里持節寬顧憂
更煩幕府開碧油文書堆案如陵丘焦心靡憚勤咨諏
賓朋還進奚所求否臧吾豈無陽秋吏姦膽破民病瘳

肯綮可見才刃優孰知學富用力周取之不窮繭絲抽
寶書移監交置郵斗水那能局吞舟事機鼎來寧易投
紫清側席渴告猶東風破冷初和柔皇覽揆度當孟陬
喬雲我亦分餘麻無階稱壽軒玉甌眼明西南百尺樓
繡天錦地十六州雅拜何以祈寵休早徵環召飛鵠頭
穎川歸趣鼎鉉調偉業定自追前修承家有子文炳彪
燈燈之傳天與謀殿前峩冠進鴻疇杏園亦復聯俊游
斯文壽脉江漢流何羨韋平世通侯

壽程使君和獲白鴈詩韻

流膏千里喧笑聲祥心萬丈南極星祈年未了香火債
饑客肯汙刀鑊腥此心與民同疴癢出令可忍奔風霆
仙人飛來丹楓闕俗眼詫見白鶴翎蟻封紫策屈良御
牛軛輟刃煩庖丁立談千仗環鐵甕傾耳千行頌紫冥
雅知方寸厚培植未覺雙鬢輕飄零馬蹄去踏東華塵
猿吟恐辜北山靈賸將石田沃雨露更為嘉穀除蟲螟
寥寥宗風特扶起懇懇善頌何丁寧長生祕錄啓雲笈

紫府丹臺元不扃

壽制使董侍郎

秋雲陰陰壓邊城秋風颯颯飛邊塵淮堧夕烽連峴首
往來羽檄無時停那知籌邊樓上一長嘯環六十郡皆
陽春老翁哺兒誇說尹連年我倉歌既盈皇明如在殿
西角恩許借留為福星六弧標慶當揆度載途鼎沸歌
謠聲請公細酌成都酒拄笏看度西山雲只將祭酒瞪
目意坐鎮坤軸如砥平可憐兒輩見坎井孰知我公身

遠萬里心朝廷天生人物關運數豈為爾較山重輕浙
江時巡今四葉上流地險如建瓴強敵逆天久厭力
困尚逞牙距獰膽折棧雲不敢向介冑酣眠宵徹明雅
知折衝妙方略胸中歷歷不啻風雪身經行我聞四海
如一體手足雖異脉絡元相親癢疴何適不關我仁者
頃刻安得寧吾皇盛德堯舜主包瑕匿垢韜厥靈一朝
震怒詔薄伐天戈所指壺漿迎西南倚公九鼎重草木
亦自知威名寶書斑斕真學士陣圖指授諸將軍頻來

寵光對赫奕富有學問規經綸蜀才自昔比齊魯公既
崇學揚其文更須度外廣物色聲病未可拘豪英蜀民
生理日艱急公既減賤矜其貧張弓何時可復弛一分
可寬寬一分蜀邊儲峙僅虛籍公既檄吏探其困餽糧
千里憂不繼渭上可無人雜耕蜀兵十萬今有幾公既
選練蒐其精將驕易置端在我尾大安得平如衡公心
渾如古井水云云外物何關情公才信是澗壑松大厦
安樂扶其傾勿謂蜀漢彈丸土鄴侯用之開西京間關

武侯亦良苦千古大分垂丹青願公為國一引手饑食
渴飲心經營從前規模會展拓蓋世事業看崢嶸旆旌
揚風出子午笳鼓動地超三秦毋使鄼侯武侯得專美
蜀山豈無齊天之石可磨亦可銘少徐帶礪河山盟命
圭相印酬元勲胙土奕葉疏恩榮却歸麻壇之山命仙
侶脯麟酌醴一曲歌長生

壽東師楊尚書

去年拜公北定堂中秋翫月喧絲簧長風趣駕沂江艇

恨不初度斟一觴轉頭玉鑑秋又滿北定風景遙相望
寸心炯炯千里共欲往從之川路長五年為帝屏南服
掃清塞塵為樂鄉盡捐歲糴為丁壯米斛二萬饒積倉
民無箕斂士宿飽一面屹立如金湯平安遙夜飛炬火
燕寢永晝凝清香雅知烹鮮不可擾豈無發硎善而藏
官閒選勝極曠與天巧為公時雨暘五峯講席環子佩
北巖布金開道場要將名教植根本參以佛法芟莠稂
君不見海觀煙濤碧萬頃衛公心眼周八荒又不見開

福浮屠玉千尺給事願力同覺皇得如我公志叔父未
許二老相頡頏眇然人物殊乏使鼎來事會那可常維
北有斗天喉舌乃作福星私一方何不喚歸坐巖廊五
色線補舜衣裳拓開賢路舊荆棘勿遣旄頭森角芒腐
儒憂世心慷慨百未一成鬢蒼浪公憐不麾客倚牆肯
借齒頰加雌黃頌言我豈知已私民亦勞止須小康岐
山之顛豈無巢鳳凰何時口銜瑞圖飛高岡我亦刷翅
相從千仞翔引吭一聲鳴朝陽請賦卷阿之詩之九章

壽史丞相

君不見唐朝郭元振退朝愉色奉溫清又不見國初王文康黑頭拜相歸捧觴台袞崇嚴親壽考歷數古今良亦少而况二老偕耆頤如二公者那易有四窻爽氣舒雲霞相業之盛專一家父子弟昆踵科級到公名業尤榮華蔡州擒吳抑何壯開幕江淮護諸將手提黃鉞卻橈槍即軍中冊右丞相我乘馳驅亦勞止袞衣趣覲天顏喜垂紳列弁競趨迎恩遇之隆昔無比

書懷

字民能使民和悅
儒術信與吏道別
十年妖祲滓太清
有耳厭聽鞀鼓鳴
創殘之餘忍椎剝
逃生要不如無生
願繫乾綱奠坤軸
罷兵寬賦家給足
聖躬示朴吏廉平
歲歲蠶登牛產犢
宦情我自春雲薄
何日西歸田舍樂

--	--	--	--	--	--	--	--	--

欽定四庫全書

滄洲塵缶編卷八

宋程公許撰

五言律詩

送游提刑祕閣赴召三首

舊聞游監簿姤節紹熙朝有子登臺省危言動冕旒不
容求外補親政復旌招四海澄清志無寧久使軫

日馭中天運冰山失勢多可能羣枉杜端藉衆賢和公
去應前席人言合上坡調停前轍誤國事竟如何

外敵日侵伐滋為元氣傷憂心耿不寐洗耳待封章弱
植如羈羽知音念五羊因書及踈賤決起尚榆枋

送成都倅黎德升赴召崔侍郎薦士召者五人

三首

憶侍西征幕叢談夜達晨別來青鬢換喜見紫泥新宸
極拱朝幘曉星看蜀珍一朝樓五鳳積憤洗峨岷

塵暗朔風急雨淫晨景昏憂心長似擣欲語吐還吞持
底舒天步云何塞亂源熱官錫裏鳩名節貴瓊璫

已往嗟奚及方來當若何幸無疎藥石庶可起沈疴
儻偽半盧扁滌腸須華佗康時付公等隨分且絃歌

送別魏校書借參預李先生韻

斯文天未祿世復有斯人縹帙磨鉛舊泥封染墨新詞
華班馬富道術魯鄒醇滿腹經綸願逢時氣益振

雙闕一回首滯留今十連河圖元國鎮泗石待宮縣南
紀浪翻雪北風塵暗天經營倚天定九軌達山川

搔首暮雲碧懷人酒淺斟萬鍾心不動九鼎力能任夜

金
卷八
雨青綾直春風紫禁深愛君須引類一念帝來臨

送別長翁制幹赴審察

戎幕接談笑薦函聯姓名自憐風退鷁快見浪翻鯨知
已方圖任聯鑣負有榮明堂足材具社櫟復何營

屯雲開宇宙八表歛風塵獵德恢天網充庭詫蜀珍一
編元祐學雙闕武林春赤汗青絲鞵修途歎問津

機欲審而發瑟調音自諧况思萬全計可畏一毫差回
幹須羣彥輪囷疊寸懷樵漁暫相狎鴛鷺豈其儕

到闕政府以辟郡未下隔對

練紙密銜袖宮門報隔班
衷腸鬱未吐殿檻可容攀
巨用須桴棟旁搜及荆管
對揚當有日傾盡不須刪

和龔彥質韻送別趙稅院

譏征傍南海何遽別同盟
漫仕不妨學能詩新有聲
煙濤千里隔書劍一航輕
槩範求諸近菊坡冰雪清

別家仲行得成都尉西歸

遠役得佳伴天涯還摻袂
憂端今轉甚漫仕意何如
落

筆敏無敵軒髯豪不除市橋春好在勿共酒杯踈

華陽尉授代喜成二首

唱第八年久折腰三考書上官容我拙樸學與時踈冷
落隨陽鴈蹢躅上竹魚平生經世志窮達豈關渠

冉冉歲云暮齊邱促戍忙倦憑南郭几靜寄贊公房夢
想蠶絲軟涎流蟻杓香循陔歸潔養一笑樂哄堂

用光弟攜兒送至南定

親友遠追送後先還故鄉殷勤仲光父嫪戀及江陽執

手哽無語修名那易量歸來訓子姪椿桂會聯芳

挾文薛君自賦五首克已讀書安貧擇交訓子
為題戒其子婿王叔儼萬里索和

為人非外鑠已與物同之私欲陰霾蔽良心日月虧若
能無窒礙底用苦思惟天理渾然處吾生自有涯

靜得山林趣閒知日月長清風披竹素小雨潤芸香外
飾謝文繡饑餐須稻梁人生有同嗜只此絕難忘

賦予有常分非闕智力求違行能自信顯晦復何憂瓢

飲賢顏子瓜疇隱邵侯曾中吉祥宅何處不天游

士能知尚友豈必盡同時雜鮑蘭胥化亡羊路或岐醴
甘知易絕絲素亦奚悲可以交難擇而忘伐木詩

萬事煙雲過須留尾段看芝蘭庭砌茂風雨夜燈寒楚
澤荷緜綠燕山桂染丹詩書門戶壯何待侈重藥

壽李悅齋五首和送三榮使君韻

南薰諧玉軫舜殿載賡歌天憫蒼生苦人如安石何無
心書咄咄有術辦多多肯學癯山澤楸枰詫爛柯

宇縣風塵暗軍需色目繁時機寧我待心事向誰論
聚螳爭慕泉深驥渴奔非公能借箸猛風恐徒捫

國鎮重雙壁寵光均一時姱修甘俗忤忠憤倚天知
道微環急難忘側席思分明調鼎味梅熟雨垂垂

衡泌春無盡湖天風快哉書堂三壽語仙籍幾生來
一髮扶周鼎千金築隗臺人心索調護根本更須培

磊磊松椿幹淵淵金石聲功名寧貫我富貴本無情
對三千牘習奇百萬兵扶持天意在容我請長纓

送道傳姪旅中赴省

上國友多士三年期一鳴藝須專必勝祿逮養為榮門
戶久灰冷雲霄如砥平五豪同着便一為起家聲

叅選成都親友追送月夕飲江上

久聚未知樂暫離能許愁清江一輪月後夜兩般秋語
倦且呼酒寒侵頻索裘鼎湖龍去遠憂憤涕滂流

留別李貫之大著二首

車馬紅塵裏閱人誰似君
泂流傾世論砥柱倚斯文籍

甚詩書譽超然利欲醺相從期歲晚蘭佩襲芳熏

二老俱黃髮遙憐望倚門淒涼遊子意慚愧主人恩酒
舫湖光灑書燈夜雨昏三山渺雲海何日聽重論

楓橋寺侍悅齋先生誨語三日而別

唐人舊題處那復有江楓寺近闔閭國門當窄窅峯清
風三宿戀紫氣一尊同恨與心知別煙波千萬重

雨中送客觀魚閣

即少陵東津觀
魚賦詩處也

送客觀魚閣山光水色中最憐秋慘澹况復雨溟濛坐

久覺衣薄杯行到手空恨無佳句子喚醒少陵翁

風雨過南溪

小艇泝洄穩短篷興寢勞斷崖榕倒影亂石水翻濤過
雨山如沫終風晚更饜愁須詩自遣吟罷轉蕭騷

三江曉渡

喚渡三江岼停車兩眼明煙涵秋日澹露洗曉寒輕山
色晴逾爽波流怒未平詩翁舊游處有句不堪呈

陪憲節飯石堂書院渡江游雙泉墅即席和韻

復輿杭野渡竹逕繞平疇紅萸前宵漲黃花幾日秋談
鋒蜚屑玉巖竇答鳴球山水饒心賞能忘恤緯憂

仲春八日自成都起程度劍閣

蕭寺深居穩春深殊未知偶然成遠役猶幸及芳時麥
浪含風軟花光眩日遲客行無復恨隨處可尋詩

秉炬游麻仙玉華洞

雲峯環翠幄洞戶闕瓊臺勝處難名狀飛仙此往來近
應通玉局遠或接蓬萊安得一伸臂乘風遍九垓

送劉時可縣丞奉母游岷山

西爽抗層霄南牆日見招
乘春扶鶴馭披霧過龍橋
香火祈壽煙霞遠俗囂
歸來索吟稿起我意逍遙

過中岳渡月出峨眉山上

返照中岳渡峨眉分外清
一彎新吐月共我兩忘形
露下沙逾白宵寒酒易醒
荻花風索索擁被不堪聽

山中戲雲端子

追路歸山後開關喚客眠
那知言在耳已作醉逃禪
急

雪濃節瓦中宵冷透
氈清愁分不盡惜別意淒然

題丹景山

原廟標丹景神游想
岱宗寶龕巖石像紺殿鎖雲峯
浪說侵疆復何當
檢玉封天門東北望
漠漠曉煙濃

題信州半月巖

巖際半輪月神工幻怪
竒本來無顯晦何自有
盈虧嵐霧凝蟾彩
藤蘿影桂枝能令
萬里客為爾憶峨眉

炷香至德山

異時聞至德滴水洗沈寃

唐悟達國禪師遇十三尊者洗人面瘡解宿負

空寂

等三世悟迷同一源松杉膏宿雨樓閣麗朝暎猶恨高

峯頂藤蘿未得捫

自船莊過化城留宿翌旦炷香宣石橋卯塔

路欲轉前嶺僧邀宿化城飯抄青飢軟茶淪乳花輕嵐
雨侵衣潤松風入夜清辨香宣老塔坐待日華生

侍飲寶子山遊忠武侯祠

一郡最高處元戎領客遊雲根棲萬井城角帶雙流日

薄樓臺暝風悲鼓角秋卧龍千古恨煙靄隔神州

題馬溪寺二首

久客愁多雨清遊喜驟晴雲藍猶獨踞玉嶺忍雙撐洞
口龍方卧山腰虎尚獐方池竟何在一水至今清

先子舊遊此余時方五齡風神見圖像雲體想儀刑衰
髮年年白遙山面面青不須論舊事欲說喚誰聽

留題馬溪寺二首即用前韻

玉筍競秋爽翠屏張曉晴天開金地勝鼎峙紫霄撐見

說禪心靜能調異物寧十方鄉水海何處不澄清

水觀禪師

三峯屹

五如屏

翠珉瞻手澤六十有餘齡囊錦傳宗旨雖沙更典刑髮
緣憂世白眼獨為山青蕙帳搖歸夢秋猿正可聽

香積寺午齋

峻陟龍門路來參雞骨師樓臺春雨霽魚鼓午齋時倦
憩僧留話荒尋僕憚隨一筇支野步且以暮為期

挽桃源使君虞公二首

疇昔交諸季，曾聞說長公。聖涯探突異，詞藻亦精工。偶
幸趨徵詔，方當順下風。颺旂無處問，延佇鬢飛蓬。
解印桃源後，卜居梅渚幽。秉心難偶俗，樂道自忘憂。故
國八千里，妖氛六十州。公魂如不泯，時作玉芝游。

挽前眉州使君廖子長二首

二老金蘭好，諸昆筆硯交。坐隅親問字，投分漆如膠。決
皆雲間步，驚心水上泡。屋梁耿殘月，含涕祖西郊。

卧罷花石戍，夢蝶古渝津。秀子嗣榮祿，諸郎皆聘珍。笄

加陪墓室霧雨暗車塵今代誰班范牽連漢傳循

挽永康守成寺簿同年二首

模楷親前哲丰姿自軼羣回翔垂白髮凌厲即青雲幕
府列功簿詩書清塞氛寶仙催命駕拱木漫新墳

友愛根天性令人古與俱棣華雖殄瘁玉樹更扶疎經
濟終齋恨循良誰讀書慈恩共心賞霜月淚霑裾

挽潼帥許侍郎成子三首

天地英靈氣風雲感會期龍頭推蜀產骨鯁自天知雨

露榮三接江湖滯一麾甲兵何日洗遠慮憶著龜

正色趨文石危言竦列紳直前香案曉批敕瑣闥春天
要明堂柱人間匠石斤汲公寧妄發軒冕付平津

雪慘龍沙節春濃豹尾班難銷方寸赤不待二毛斑力
盡三醫謁憂深九虎攀丁寧尸諫語端不愧家山

七言律詩

元正書懷

甲子循環六十年手披新歷意茫然了知自性覺元妙

寧與世間寒暑遷，寡過得如蘧瑗化。諾惺要了瑞巖禪，故園未卜西歸日。遇好溪山且數椽。

立春

月墮霜空發上亭，土牛今日却鞭春。六花度臘慳呈瑞，二麥何時飽食新。四序斡旋均一氣，萬殊元化託洪鈞。已煩元帥調新律，早願三邊靜戰塵。

正月二十日雪

東皇弭節未多時，忽作漫空六出飛。商畧田功興嗣歲。

翁張天巧惜陰機
麥才覆土欣蘇醒
梅久烘晴稍發揮
蕭寺掩關終日卧
忍寒不著獸紅圍

正月念三日以南床劾論去國憩淨慈客館蘇
稅院惠二詩和韻

意不求全那得毀
本來知足豈須多
世途何處非乘險
古井如今已不波
緣督更須師漆吏
乞墻可使愧鄒軻
君看野馬難羈束
寧羨天街想玉珂

寄包古剎客過門煨芋殘
爐晚未溫
萬里風塵迷遠望

三峯文獻接諸孫湖山春動饒佳趣杖履時來共至言
一笑老仙堤柳畔人間誰怨復誰恩

仲春再雪與禪衲夜話

蓬萊不肯著癡仙放去湖山一任顛術不競時甘斂退
僧知同趣喜留連春深半地雪盈尺雲破遙林月一弦
撥盡灰寒吟未穩不如欹枕愜昏眠

寒食

賣錫簫咽紙鳶飛愁思驚隨節物來誓墓可能同逸少

操音誰復憫鍾儀松楸此日空瞻望桃李當年奉宴嬉
投老與公同一恨淒風撩亂我心哀

清明日郡圃遊觀者如織余以趙園之約至夕
乃還若水賦詩後四日偶因小疾謁告清坐始得
奉答

老怯尊前倒玉山清晨有約夕曛還似知是日笙簫沸
趨賞羣芳綺纈班細閱餘妍能幾許喜因小疾得端閒
持觴不酌春應笑若欠題詩亦厚顏

三衢道士鄭自得即天慶寮舍種梅疏池為小
亭扁曰橫清有詔住南岳道觀復以此扁其亭
解官事言歸袖詩相訪為次韻

高人久已悟空花養就丹田日月華方丈有誰來晤語
橫枝相對慮無邪雲開衡岳重回首雪滿柯山遲到家
乞得歸閒來叩戶摘將青子薦流霞

和虞使君賦山茶花二首

眼明絕艷照周年傲雪凌霜分外妍鶴頂染砂那得似

犀棱削角自蒼然，若為白瑞三冬裏。
獨抱丹心一節堅，歲晚須公與商畧。
儘渠春晝萬紅媽。

梅花蘸影碧江潯，似怪高人金玉音。
詠絮可憐清寡伴，冠霞來與共論心。
定知句迫瓊瑤響，莫惜杯浮琥珀深。
姑射清寒西子醉，一時嫵媚索高吟。

道傳山丹一本兩花舉，以見遺夜牕翻書偶見。
劉潛夫嘗賦云：偶然避雨過民舍，一本山丹恰
盛開，種久樹身樛似蓋，澆頻花面大如杯，怪疑

朱草非時出驚問紅雲甚處來可惜書生無事
力千金移入畫欄栽因借韻同賦一首

種類山茶花較大一根恰有兩枝開鉛砂煉熟大還鼎
琥珀琢成雙勸杯威鳳想從丹穴下飛仙近自赤城來
便船惟會加培養寄伴階庭芍藥栽

仲秋池塘荷蓋方密有四五朵花

公暇羽衣憑水檻漸多翠蓋倚紅粧想應三伏怯袪熱
待到仲秋吐艷香藻澗魚跳晴景眩樹陰蟬嘒晚風涼

意行偶與欣佳會門外催科正自忙

擬玉谿體賦醴泉墅海棠二首

東皇張飲錦周遭華艷偏宜望處高
結綺樓深迷玉樹銷金帳暖醉羊羔
先驅瑞節眩穠李近侍舞衫環舊桃
乞得巫雲來比護蜚廉作橫未應饗

濯錦波光繞百遭

花覆池面下映
綠水如濯文錦

夜寒秉燭更須高恨

無麗藻供搗翰聊復重裘索俊羔
長笑董仙癡守杏可憐曼倩坐偷桃
若教入侍紅雲殿應悔從前俗慮饗

昌元郡圃看海棠紅苞爛然未有開者問訊以

詩

畫本爭如覲面奇含苞香露已霏霏阿嬌早合貯金屋
南子似羞褰錦帷花信定因寒較晚賞心何事巧相違
壁題恨欠江城句綵筆誰能為發揮

崇女擷菜煮羹

穉女春間繞舍嬉手挑野菜滿籃歸細料碧澗和根煮
旋搗香粳芼糝稀久識道腴知雋永更從禪悅悟精微

投床忽作還鄉夢雪暖西山筍蕨肥

督堰至岷下借館南浦張叔全家臨別惠以潤
石香几一峯挺拔于白雲杳靄間殊有遠意小

詩謝之

飛幟輕輿御暖風欵門何事日憧憧芳榮滿檻丹青麗
穠秀當軒紫翠重石几拜嘉才徑尺雲天無際挺孤峯
更煩指似麻壇路萬壑千巖借一筇

同家德清侍尚書楊寶學山行先過上岳訪家

諧李

諧李乃恭伯木仲之季弟其先人累承制垣以學行薦

鶴書香杳上巖雲錦里安車忽暮曛二陸久當為世瑞
一變留與護香芸中春澗壑晴如暝亭午松蘿氣自薰
倚檻欲歌招隱賦客塵痼我不成文

北新橋借孫氏宅內有井甘寒又有柳陰度夏
為宜

幸有安居暫寄包拙如鳩不費營巢日長有井供茶課
客至移床蔭樹梢無事莫將吟思攪儘閒且把舊書抄

心知守道惟玄默不用援毫賦解嘲

樊丈子思以予兄弟三年端居招飲山房為破

愁寂賦詩以謝

銜恤三年意緒凋嘉招為我破無膠露秋爽借談鋒利
霜月寒侵酒力消心事寂無機事擾詩情何似道情饒
平生我亦輕簪紱安得長年共一瓢

再賦

物華過眼半黃凋萬竅號風夜慄慄一寸古心難石轉

三生妄念易冰消鉛黃汗筆千年夢白黑文枰幾路饒
勘破古今無一事省煩更好去風瓢

借東溪卷錢莊寓居

蕩蕩青天隔九門攜孳飄泊此江村漁蓑且當青綾被
賜酒何如老瓦盆萬軸書籤須細閱九還火候要重溫
少陵有句須參透政藉幽居拙養尊

同振之德久分韻賦坐石東坡得坡字

千年間氣落岷峨驚世聲名鎮不磨唵詠西湖雖有案

經年僭耳却無波細看據石橫藜坐想見騎龍跨海過
山谷老人猶剩語是非元不到東坡

移住西門之溪上

罷官來就湖州住為愛雙流貫一城儻屋本非嫌僻靜
開窻正要納空明魚蝦幸可隨宜買鱸粥何妨逐漸營
况有雙梅供索笑昭琴底處有虧成

雨晴後同兄姪遊開元寺一覽亭飲道傳書院
勝賞幾為雨罷休霽光俄湧屋山頭松根煙暖留飛屐

金
卷八
夢岸波寒緩泝舟霧斂長江青眼對雪消遠岫翠眉浮
郊原浩蕩春無價漫索枯腸唱且酬

山色撩人共一杯夜堂淺酌不須催醉吟兀兀驚顏玉
睡思黝黝易轉雷蠟炬烘殘三寸焰水流潤浥一爐灰
西游歸趁桃紅暖相約清尊陸續開

三高亭二首

一棹松江朔雪饜椒漿曾此酌三高遠遊借與薰風便
偉觀還如昔日遭喚起玉龍嘘霧雨饒教綵蜺戰雲濤

平生最愛登高賦，盍為豐碑續擬騷。
水仙要我小遲留，探借五湖風雨秋。
三萬頃波融一鑑，八千里客只孤舟。
望迷漁荻荒寒境，思挾琴高汗漫游。
模寫自知才未稱，天隨有集更精搜。

避暑銷琴亭

老怯新秋暑鬱蒸，晚風水檻一披襟。
試教通閤喧雷鼓，何似穿崖響玉琴。
默坐自能醒渴夢，微吟時與和清音。
專城大似專丘壑，不待山行記蔚深。

重陽後一日陪憲節登清音亭飲見易亭即席

和韻

一封諫疏徹銀臺感憤題詩醉墨堆喚醒菊邊秋寂寞
爛游松下逕縈回參軍逸韻頻歌帽詩老多情不放杯
勝日追隨容湛輩從容歸騎不須催

煇父道父攜酒相伴飲飛赴寺四望亭

呂汲公所創

四望竒觀廣莫同瘦藤拄入畫圖中晴煙杳靄景無盡
醉眼模糊鳶墮空邑蕞也曾基相業并智誰復現神通

漫勞二妙相追逐勝處宜搜未易工

移居北新橋彥質惠詩和答

東書欲去意遲遲從此寧無一會期客路相逢如宿契
人生難得是閒時虛廊過午陪行食淨院中宵共說詩
此樂何時仍共賞底須籌籌佩侍彤墀

繡段輕投報苦遲隔關那復共襟期艱虞敢自求安宅
懶慢欣知不入時王粲登樓初有賦杜陵屏跡可無詩
邊聲又逐秋風勁誰有良籌動玉墀

計輝父訪予上皇山中拉歸龍溪款話一夕和

前韻相贈仍為賡賦

憶曾歎竹憩神興賡賦傳抄勸小胥偶復綠雲尋勝踐
忽驚響屐慰逃虛卜鄰也擬營環堵飽飯何當共趁墟
浮世升沈何足計得如一室靜翻書

子春再約避暑和樊子思韻

興元事慶後
閏已收復

憂端引起鬢絲長喜報梁州復故疆
相約楊園舒野步頻呼竹葉沃剛腸
颺颺翠篠風生檻灑灑紅蕖水滿塘

剡殖芳榮好看客春風勿吝費除堂

張伯修令君賦詩同韻稱慶

玉節何如素節高歸來喜氣溢東臯存耕元自有餘地
嘉植何曾生不毛采石勲名須世濟陵陽令昔幾人豪
含飴一笑春無價授簡梁園可憚勞

七曲和魏校書韻

神理之公參造化簡書千古豈虛傳權衡無意物輕重
水鏡何心人醜妍天爵一身元不欠人生萬事且隨緣

椒漿跪奠無餘禱擬續離騷愧斐然

揆初之日承父用晦以余前歲登玉華樓翫月
借宗青山詩韻賦詩稱壽仍和答之并示甥姪
防意由來似守城澗潢潔祀及良辰命名猶念記閭史
學道粗知存谷神欲誦蓼莪心楚愴愧投木李句清新
何當共覓長生訣去逐商顏四老人

和答括蒼龔彥質

不慣參禪不學仙不婚不宦忽華顛前身疑是林和靖

好句多於謝惠連
投贈頗堪華錦繡
擇交當勝佩韋弦
鷄蟲得失何時了
洗耳松風共醉眠

和樓大參韻贊史伯謙少弼二同年掛冠

俚耳驚聞古曲彈
地行元不慕僂官方
看鳳穴將雛上

伯謙父子同登

已悟羊腸涉世難
蟻夢未酣誰喚醒
魚遊自樂

與誰觀不妨散策
三巖路聽徹松風
度百灘

琴自無絃不用彈
歲寒矯節傲蒼官
青衫吏隱非吾願

綵服兒啼畏色難


少弼孝侍孀母

三徑歸尋元約在
萬緣回向

自心觀何時歎竹雲莊去洗耳香山八節灘

小詩謝雪川使君幫祠庭薄俸

地行不必羨飛仙驤首青雲恐疾顛但得一廛耕谷口
底須萬騎戰祁連齋房盡日清如水吾道從來直似絃
賴有故人供祿米飽餐贏得枕書眠



欽定四庫全書

集部

滄洲塵在編卷九

詳校官庶吉士臣瑚圖禮

主事臣呂雲棟覆勘

謄錄監生臣嚴續曾

謄錄監生臣俞光豫

欽定四庫全書

滄洲塵缶編卷九

宋 程公許 撰

七言律詩

正旦上壽紫宸微臣以祀太一初獻不預賜茶
酒退就殿門少歇俟追班拜正旦賀表

去歲楓橋度歲除寒燈一盞自抄書誰知東觀歸繡史
仍許西垣綴佩裾四闢不憂獐虎豹九成猶恐眩鸚鵡
彤墀百拜陳金鑑只願中興似國初

元日即事四首

鳳銜丹詔紀初元，餘恨難忘祀國天。
賢路會當三接畫，宅家可卜中興年。
出車未可忘多難，覃耜尤須祝大田。
千古逃吳稱至德，有周篤慶更綿延。

端居俄換歲華三，荼苦於吾若薺甘。
照影菱花驚雪白，強顏柏葉借春酣。
人間擾擾多岐路，聖世悠悠欠指南。
一穽黃雲晴晝永，叩門誰辨與同參。

憧憧行李不曾休，消遣年華古渡頭。
得似青衿專挾冊，

浪隨黃帽熟操舟歸裝趁得椒花頌洗盞連呼柏葉浮
容易一年春又換賞心可欠七年酬

屠蘇最後釀銀杯歲月侵尋老景催離坎新工幾銖火
乾坤生意一聲雷君親未報鬢驚雪名業倘來心欲灰
一笑山頭水萬仞曉晴還見翠屏開

元正和洪司令紀事二首

寸心炯炯水朝東雲繞通明一朵紅螭籀薦祥天眷顧
鷄竿銜赦日冲融遙知萬國趨堯彩可使前旒隔舜瞳

金史曰居全言
卷九
京闕陵園須汎掃聖心原不慕邊功

兔魄烏輪西復東流光那肯駐顏紅
禮羅君不見温造志廣吾寧如孔融
難策材駑攀逸武相期親壽轉方瞳
飛騰景暮何須問聖處慙無一髮功

再和前韻

條風吹轉斗杓東護日祥雲一段紅
聖主慶成神寶重老親喜動壽杯融
塵沙自染雙蓬鬢歲月難磨兩碧瞳
斗印垂腰吾分耳早看兒輩策新功

和彥威紀事二首

久戍兵殘將亦驕，幸時轆轤與民仇。
邊關撤警久階厲，甲冑棄殘尤誤謀。
淮浦方期三就緒，王官忍賦四宜休。

江城永夜欹寒枕，數盡殘更有幾籌。

三關不守，反以綿襖代甲冑，卒徒之

易潰由此得之老將云

民勞無訴卒長征，安得天河洗甲兵。
虎出柙誰當任責，鳥傷弓後可無驚。
峽山風雪清尊共，楚澤雲濤去棹輕。
憂國寧忘絲髮補，忍隨時態慕鮮榮。

聞山東捷報

幾年豸虎費隄虞一旦芟夷快決疽黼辰可曾經赫怒
金甌幸未失枝梧戎車喜奏膚公捷獨柳寧煩偃僕誅
更願清朝懲往轍剎須汲直折姦覩

連日得關表捷報聞敵騎無復留境上者志喜

成詩

十里旌幢轉曉風行營日報捷書同悠悠何補青油畫
栩栩驚回畫角雄壯士有懷時拔劍仁人無策弛張弓

天機翕闢一翻手看取桃林騎火紅

題卷子會

龍飛景運詔賓興將相之階自此升毛穎銛鋒須快戰
楮生衷甲作先登精思可使文加點抄寫能令價倍增
努力殺青男子事功名未盡剡溪藤

送彥威姪赴類省試

吾兄僊去幾何年情未能忘一綫傳相見幽明參勇決
正須行藝兩渾全世科從此傳燈廣親黨同時奏凱旋

孝友令恭天所祐修途萬里穩加鞭

送句甥持敬赴省試

外祖憐孫肇錫名瓊林宴匝兩周星果能冠歲露頭角
須信故家猶典刑笑問兩昆眉底白喜覘二老鬢猶青
遄飛借與秋風便側耳英聲駭雷霆

送家朝南徵君二首

萬里岷峨入貢琛怒風搏上九霄鵬人才於國猶元氣
天步如今甚薄冰家父憂心宜有誦嗣王求助可無懲

男兒不朽須名節黃木之灣又一燈

獵獵霜風不滿旗留連尊酒話襟期
紛紜世上無窮事慘淡江頭欲別時
未必交枰無活着只憂起死欠神醫
踈頑我亦宣州客傾耳囊封慰所思

鹿鳴宴貢士

蜀莊故里好揚鄰

唐昌莊君平所生處名君平鄉衡山有故宅讀書臺墨池丹井皆無恙與

郛之子雲鄉為鄉

不盡斯文萬古存漢詔十行銜彩鳳禹門三

級躍潛鱗傾心射策恩方渥努力推堅語忌陳一第摘

髭容易耳直須名業任千鈞

聞喜宴恭和御製賜進士詩

九五天臨德有元自應皇化軼羲軒囊封何日無忠諫
延策今年許盡言端藉多材戡世難盡銷殺氣作春溫
萬間華屋非難就宋桷應須妙選掄

甲午歲除即事二首初被聘召之命末章感遇
述懷

行年半百又加三隔一宵還一歲添邱壑甚慙心賞誤

軒裳可與道情兼
醅酒熟頻斟玉
耐冷燈青密下簾
絕愛緜梅開較晚
雪情要我日巡簷

乞州如斗苦難諧
遣戍蓬婆也自佳
嚴詔自天疑過誤
虛心造物與安排
輶猶未空三輔輦
鼓何當靜兩淮

經世無才羞汲引
寸丹咫尺是堯階

制閭初辟富順廟
堂欲以威茂相處

俄有入
秦之命

閱邸報上臨朝召用二三者
德志喜有賦過眉

山呈悅齋

人間二十八年事天運盈虛一刹那金塢漫憂無處着
冰山想復誤人多問唐偃月消磨幾奈魯靈光爰葉何
黃道方看升日斂洗兵馬更挽天河

叅選銓曹

筭瑟明知繆所操才疎分不與時遭扶犁輕失田家計
斂版來趨吏部曹邂逅功名嫌預借馳驅州縣敢辭勞
憂時空有崢嶸憤九鑰天關守護牢

分直玉堂有懷

瀑直稍寬庚伏暑傳宣來自玉皇家
冰盤滿掬三危露
金盃頻斟九醞霞
銜鼓驟驚行抱牘
索鈴猶誤吏催麻
叵堪厨釀甜如蜜
漫倚橋欄看水花

和史子修投贈二首韻時被命至玉堂

儒習平生祇自酸
可能學古到商盤
風塵世路知難拗
潢潦詞源恐易乾
已愧登瀛聯俊彥
那堪上水費嘲彈
餐榮愧乏經時策
安得軍中有范韓

歷盡羊腸足力酸
湖山正好暫遊盤
羈愁等是如鴻集

鄉信難忘問鵲乾瓦屋三間非易借蒯緱長缺莫多彈

玉川那用輕參尹沽酒誰為赤令韓

史欲謁京尹嘗力止之

直舍紀事二首

獨冷官曹可得禁近來冷過玉壺冰無錢沽酒休煩送
有馬知誰許借乘罷謁最宜吟慘淡愛閒贏得睡情騰
鸞鳳自合翔千仞誰遣人間罣弋矰

豈不懷歸畏簡書人生何處不蘧廬靜看世態冥心久
貪問生涯畫計疎休作勞神狙賦芋可同貪啄鳥馴除

飯疏有味親長健此樂千金莫換渠

歸班之明日以六參入趁起居

湖海飄搖誤召環春風入綴紫宸班恭聞聘幣及巖穴
不以多材遺蒯管靜念升沉皆命分喜因蹈舞拜天顏
承明莫作官曹看汗簡須憑直筆刪

題高廟宸翰

古錦囊開兩軸書宸奎騰采動山墟能令使者分王命
想見中興似國初九鼎可為宗社重萬年誰謂草茅疎

襲藏何但傳家寶汗簡他年或作諸

孫氏所藏高宗宸翰其一軸使敵回

趣入奏事其一軸殿試編排上親擢鼎甲三人王十朋
閻安中梁介試卷號皆聖語褒美閻公論國本尤忠鯁

以西省職事被差孟夏景靈宮朝饗跪進茶酒

齋宿道山

承明三入笑陳人藥砌翻紅又一春
英藪並馳慙領袖
斐章何自稱絲綸駿奔數幸天顏近
駕拙難勝寵渥頻
月蠹腐紅無以報囊封敢不罄披陳

上茶使鄒監丞秘閣

年時觸熱曳長裾重拜劉公一紙書駑馱何堪蒙錦繡
木瓜無復報瓊琚還因持檄親犀節恐趁追鋒侍玉除
九萬扶搖鵬運濶可能倦翮借吹噓

西省齋宿陪侍左史曹舍人話舊以除當字賦
詩下教和答

一行奎畫寵新除左陞濡毫要直書何幸鵷班連省闈
誤令鼠璞雜瓊琚雲窻霧閣非官府璧月珠星近帝居
二十年前舊騷律琢磨今乃過黃初

潑面緇塵不易當佩蘭誰與共祇芳迂頑羞問翻階藥
邂逅容分夾案香且可埋頭繙竹素底須繫肘詫銀黃
看公自致青雲上老我何妨誚斗量

寄呈座主李左史三首

絲絢趁曉紫宸朝憫俗超然賦遠遊富貴儻來心止水
隱思不耐鬢先秋誰知皓首太玄草獨對青山大白浮
只恐萬牛勤挽致未須封戶橘千頭

九萬雲程不作遙暫教六月息鵬遊騷情吟徹湖天曉

義膽寒生石劒秋想見床頭談屑墮時澆椀面乳花浮

雲山不隔師牆戀憑仗緘書乞點頭

石劒一峯高丈許立三益堂前

世紛振觸不勝憂尚憶薰風故國遊
惝恍夢回身八翼
淒涼別久日三秋願馳玉軼天津阻
擬問星槎海浪浮
千載指南先覺在行迷未遠却回頭

壽楊浩齋二首

駕鶴飛來白玉京疎髯秀色自仙真
要看轉物天機密
更念居閒學力新孔孟以來扶墜緒
義黃向上屬誰人

雅知仁靜宜黃耆仙谷煙霞不盡春

澗洞風塵漲九垓萬牛何事首空回
隱思未易甲兵洗
商畧須先根本培
望望壘封頌紫閣
駸駸鼎味熟黃梅
頌言豈為樞衣舊黃道方期日月開

立秋後陰雨踰旬新拜禮寺司直之際寓大卿

廳一憲清邃

伏熱翻成十日陰鬱蒸還復似梅霖
常疑兵結蚩尤侵
猶喜刑清貫索沈
借得一憲堆簡冊
浪憑三尺替山林

方池不斷簷花滴，欹枕中宵響玉琴。

夏旱奉詔餘杭疎決歸上封事

桑林忱禱極焦勞，奉詔寬刑輟省曹。
玉食不怡先損已，璇穹何忍尚屯膏。
運河今乃通車轍，管井誰能舉桔槔。
飽食太倉心自愧，封章不隔九天高。

久旱禱雨羅仙有應使君再賦索和

未饒風伯怒吹雲，且為仙翁薦寶熏。
光奪鍾山耕父室，令傳古道阿香墳。
流膏注注溝塍溢，喜氣酣酣麴蘖醺。

太守同憂亦同樂兵厨餘瀝不難分

禱雨有應和郡廣文希白韻

金氣胚渾火尚流亢陽漸已裂龜疇沛然一雨酌精禱
暫與羣黎緩隱憂千里耕桑猶樂土三邊鼙鼓又防秋
白頭底是寬閒日欸段令人羨少游

郡以閔雨勞民曹顏若春有禱於仰山塔誠念
感格甘澤隨應辱教佳製借韻以謝

鵲尾爐香半未灰古潭瞥地撼風雷單車陟降固勞止

萬壑喧騰亦壯哉，高廩正須端策驗。應門已報送詩來，
憂時更願人才富。重與南山詠有臺。

題射洪顯惠廟

余以邊事有禱，得籤。今朝好晴景，久雨不妨農。

靈皇夙嗜祇江山，卜宅煙霞縹緲間。帶水淨涵青黠黠，
畫屏中嵌玉孱顏。眈眈洞府自宮闕，裊裊天風來佩環。
一炷爐烟通肸鬩，願開晴景遍人間。

再遊鳳凰山寺

嘉定辛巳冬十一月，南海崔尚書自成都帥。

攝行宣威府事余同於潛洪舜俞以掌記從
一宿鳳凰山寺後十二年鄉先生內翰侍郎
隴西公以制置使自左綿進治小益復以幕
介陪後乘辦香再為定慧大士祈印證許刻
像為全坤銷釀兵劫留館方丈借熙寧詩將
劉景文詩韻記事二首

人生出處豈前謀歲一星周再此遊世故鼎來憂似海
壯心空在鬢先秋戎車擁路抽身去僧鉢分香勸我留

擾擾戰爭何日定從前變滅幾浮漚

西康州隔暮雲邊風去不來今幾年神曠此山良有以
客行何恨獨潛然瑞圖那復來阿閣王澤何當復下泉
定慧光中祈印證等慈心與佛齊肩

已嘗早稻晚禾得雨亦驟長出城按行阡陌歷
諸寺而還成七言二章

歡謠千里慶西成小隊傳呼畧按行雨足陳根重穎粟
眼明多稼盡坻京靈君禪悅屏燔炙樂歲人和喧送迎

老守何功享成事祇憑一念輯和平

稻隴楓林錦纈文秋郊樂事壓芳春為山谷訪竹尊者
介衛公尋石丈人午暑緩觴休北寺夕曛趣駕度東津
勝遊偶際文書暇一笑溪山面目親

中秋節侍楊尚書待月南樓

羽扇風清夙靄收元戎邀月上南樓卷回天外連宵雨
借與人間一夕秋六合掃清知有待微雲點綴故宜休
闌干直北頻搔首何限關山笛裏愁

久雨快晴侍楊尚書燕鎮遠樓

瘴雨彌旬快作晴
小山香馥晚風清
高秋幕府閒書檄
落日江山擁旆旌
形勢自應專一面
關河猶未息交枰
雅知牧御須才望
盍早還朝洗甲兵

和前送吳季永工侍韻二首寄宣城使君吳尚

書叔永時季永尚留宣城郡齋

對床有約二蘇公
湖海何曾出處同
得似公家情繾綣
相看歲晚樂冲融
宛陵信是佳山水
公館翛然若翠蓬

卷九
吏散不妨談陸續是非馬耳射東風

詞林巨擘久心降萬斛龍文隻手扛革履似因求見數
朱衣甃隔引前雙明當歸闕翹材館想未能忘濯錦江
剡向雲間籠白鶴他年携伴讀書窓

嘉平八日禱雪崇福觀集霰隨車至晚大雪凡
三日廣文邵文志喜賦詩勉和元韻

集霰纔隨紫馬回散花天已御風來塵袂瞥地開仙境
和氣融春入酒杯寒沍潛消人物癘清吟肯傍簿書堆

南枝陡覺精神別，探借東皇信息催。

除夕立春送姪女歸句氏弟家兄弟甥姪皆會

席上

歲除還有歲更新，華髮相看手足親。
千古風流企王謝，兩家情味匹朱陳。
纏紅飲徹椒觴曉，剪綵歡生綺席春。
瓜葛綢繆寧易有，况無樂事與良辰。

禱雪麻仙洞前立春一日湫壓縣境而雪霰已
集連日六花呈瑞以元宵設供權父及士友皆

賦詩二首和韻以謝

駑怯深慙政理愆，驕陽積擅北風權。
青鸞趣駕賓蒼隼，白鳳先驅從列仙。
坯壑蟄夢驚離貝，闕裂龜渴飲變瓊。
田空餐那有涓埃報，只辨爐薰薦洞天。

陽烏且緩浴虞淵，瑞白春花勝臘前。
臺笠看人爭播種，扶犁撩我夢歸田。
千金何術能醫國，十雨從今更問天。
暫駐飈游須淨供，元宵未暇寶燈燃。

觀壁間鄭宣威早春賞杏花之作，司令洪丈命

余即事用韻

乍聽歸燕語窗櫺
催放蓮燈萬炬紅
掃盡妖氛春色外
喚回和氣雨聲中
時機翻覆須天定
人事扶持願歲豐
幕府賢勞愧羣彥
吟詩留俟採民風

再用前韻

過雨麴塵綠淺綠
倚風綬帶娜殷紅
稍知春在酒深處
尤覺日長書課中
典記誤令參鄴下
封囊也擬學新豐
黃雲催熟崆峒麥
破敵何須鶴唳風

邑令招講上元故事與簿尉同賦二首

星弁熒煌鼎足三河陽春意十分添和衷總是清時瑞
令節應須樂事兼山徑晚陪瓊玉佩訟堂夜醉水晶簾
羽書撤警年方熟賸折梅花揷帽簷

人情悅豫樂音諧新覺華譙氣象佳璧月輝輝三夕永
榆星歷歷九霄排笙歌圍坐花如海散核堆山酒若淮
富貴方來付公等五雲深處豈無階

借寓楊和王府秀芳空屋寬靜爽潔意甚樂之

紅塵難得安棲處借屋三間委巷深地僻喜無車馬過
官閒不廢簡編尋傍牆幸有數竿竹護筍看成滿院陰
須信市朝為大隱心無事累即山林

李德夫司理即永康官居闌小軒賦詩二首求

京花和韻遣送

老於俗嗜異酸鹹枯木無心倚碧巖花事因循渾漫與
吟邊荒落幾曾芟似聞公館小軒闌遙揖靈峯萬石漸
竹素堆床官事省燕梁日永語呢喃

西洛風流壓衆芳十分國艷與天香護持翠幕千窠錦

羞澁青銅兩鬢霜不怕眼花疑保福

羅漢和尚一日同保福長慶三人見

牡丹障子保福道好一朵花長慶云莫眼花羅漢云可惜許一朵花

且將色相問空王書

窻不要笙歌雜茗椀相娛味更長

賀府尹董侍郎落成貢院

縱壑潛蛟變化秋岷精表瑞協人謀萬間指顧璇杓運
千柱穹隆玉斧修小試鳳樓心匠巧快看蟻陣戰功收
向來三策天人學盍為諸生一點頭

廣漠亭二首和陳憲益之舊韻

呂汲公所和

百乘去為天下宰暮年嶺瘴隔京都君看封禁嚴邊瑣
力碎調停此範模赤烏儻來金鉉貴青衫依舊紙屏糊
秦關北望煙雲渺何日重還舊地圖

萬峯銀雪排天險千里封溝闢蜀都盡揖瀆靈趨几席
始知國相妙規模心同典午深衣樂褊笑荆文紙閣糊
元祐風流如可問羣賢登用是良圖

陪憲節飲見易亭及萬里樓和韻二首

郭洞春深物象妍得陪繡斧漾觥船連山齒萃檐楹外
六畫分明几席前記就儘教騰紙價碑成還恐費松煙

見易亭憲使新
創并作碑記

熟知邱壑饒心賞正未能忘賦下泉

天宇修眉分外妍雷垣波靜穩行船向來蛟鰐驕無奈
今日鳧鷖戲滿前爽氣逼人溥瑞露醉題眩眼爛非煙
薄才羞與雲龍啜脫骨端須第一泉

余為華陽尉三年事制置使權牧都漕兩使者
皆以文字辱知不盡責以吏也既滿戍擬濠陽

丞歸親旁范使者為改註左縣學官瘡病再作
未即就成成二詩呈兄長及諸友

錦江傲吏真癡絕公事無多日賦詩風月諱人貪拮拾
烟霞痼我費醫治非關瘡鬼工為厲豈有詩人不耐飢
三月不曾吟一句汗顏何以有毛錐

挂笏西山興已濃蚌溪邀我採芙蓉客遊舊有詩盟在

余冠歲隨侍仲兄遍游涪上十景皆有賦咏官冷新添野性慵世路今方悲

梗塞家山暫許樂從容等閒袖手棋枰外紫電中宵掣

劍鋒

和馮潔己節夜見過二首

我生恨不際休嘉浩蕩憂思未有涯書劍伴人常作客
黽毼暖夢暫還家葭灰漸喜回陽律麥隴時須潤雪花
休沐許寬書檄繞靜中較似日長些

破悶孤斟莫厭深風箏時為送清音平生過境無餘戀
令節因君忽愴心梅角吹殘愁不寐柳枝放去香難尋
蛾眉列屋功成後未用淒涼學越吟

載酒泛芙蓉溪游富樂伯用再和前韻牽課同

作

霸氣淒涼憶豫州
薜蘿掩映小山幽
不知今古幾枰誤
空使英雄兩淚流
借問長槍威塞外
何如短棹老滄洲
臨分更隔芙蓉語
投贈慙無玉可舟

江漲有感

余歸期尚緩於黃池度歲賦絕句云趁取青
梅煮酒時意謂必可及此時歸家矣沙津留

滯半月入峽後江漲為阻日不行二三十里
自離古渝以後雖抵家不遠而約日尚賒沿
江荔子爛熟見之有感

惆悵天涯私自憐錦囊有句愧重編忍心寬作青梅約
眩眼俄驚丹荔燃浩蕩修途今幾驛紛紜歸思日如年
不因煤穎相料平理何以遣懷風月前

買舟至崖祀陸使君

水曹羈我倉于囚貸與潼江一釣舟拖轉清灘微齧沸

棹移曲巷且夷猶
偶因橫岸穿沙徑
絕愛寒煙簇晚洲
明日玉屏重覩面
九歌待續水安流

